

Kudliwe impahla yama-diagnostic radiologists ngesikweletu sika-R52-million

Tshwane, 25 kuNhlolanja 2022 – Impahla yehhovisi lokusebenzela lama-diagnostic radiologists amabili idliwe Isikhonzi seNkantolo ephakeme ngenxa yamafomu angabuyisiwe eminingwane yentela kanye nesikweletu sentela esingu-R52-million abasikweleta uPhiko Lwemisebenzi Yemalingeniso Eqoqwayo LwaseNingizimu Afrika (SARS).

Abaqondisi behhovisi lokusebenzela esibhedlela i-Louis Pasteur Hospital esisePretoria, oDkt Mkhabele no-Indunah Diaganostic Radiologists Inc, oDkt. Zulu Mkhabele noDkt. Mevis Ponde.

Umkhokhintela wafaka isicelo kwaSARS ecela ukuba kube nesivumelwano sokuhlangabezana, nokho leso sicelo sachithwa. Incwadi eyaziza ngesinqumo sokuchitha isicelo yathunyelelwa umkhokhintela sihambisana nencwadi egqogqa isikweletu okokugcina. Umkhokhintela azange aphenule nakweyodwa kulezi zincwadi.

Isikweletu sivela ekuthunyelweni kwamafomu amaningi okubuyisa iminingwane yentela kwaSARS, kubandakanya intela yemalingeniso lenkampani, intela ngokobungakomholo (i-PAYE) kanye neNtelantengo (i-VAT), ngaphandle kokwenza izinkokhelo esikhathini esiyiminyaka emithathu.

Kolunye udaba, Isikhonzi senkantolo ufake endalini izimpahla ze-Edison Power Gauteng Pty Ltd, inkampani esebenza ngogesi, emva kokuba inkampani yathumela amafomu eminingwane yentela ngaphandle kokwenza inkokhelo. Izimpahla ezadliwa kuMandulo ngonyaka owedlule zilinganiselwa ku-R20-million. Ukungathobeli imigomo yentela kwe-Edison kwenzeke esikhathini esiyiminyaka emibili.

UKhomishana wakwaSARS u-Edward Kieswetter uthe isikhungo siphokophele ukwenza kube lula kubakhokhintela ukuthobela imigomo yentela, sibesihlinzeka ngengcaciso nesiqinisekiso mayelana nezibophezelo zabo.

“Abakhokhintela abaningi sibathatha njengabakhokhintela abathembekile futhi abazimisele ngokuthobela imigomo yentela. Ngokwenza kanje bayaqhubeka nokuba negalelo ekuqoqeni imali edingekayo ukuze kwakhiwe umbuso okhonayo okwaziyo ukuhlinzekela inhlalakahle yazo zonke izakhamizi.

“Kodwa-ke, ukungathobeli ngenhloso nangokuzithandela okuvela noma ingakuphi, angeke kubezelelelwe. USARS uzosebenzisa zonke izinsiza zomthetho ezikhona ukwenza kube nzima futhi kumbe eqolo kubakhokhintela nabahwebi abanjalo,” kusho uKhomishana wakwaSARS.

Ngolwazi olwengeziwe sicela uxhumane ne Sarsmedia@sars.gov.za